

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, de 26. Abrëll 2021

Här President,

sou wéi d'Chambersreglement et virgesäit, bieden ech Iech, dës parlamentaresch Fro un d'Madamm Ëmweltminister an un den Här Minister fir Landesplanung weiderzeleeden.

An engem rezenter Artikel aus dem *Luxemburger Wort* gouf sech domat ausernee gesat, wéi eng Ustregungen an Erausfuerderungen op eist Land duerkommen, wa Lëtzebuerg seng Klimaziler erreeche wëll. Notamment eng Verriederin vun der ALDE (Association luxembourgeoise pour le Droit de l'Environnement) hat an deem Kader eng ganz Rei Aussoe gemaach, déi awer vill Froen opwerfen. An deem Kontext erlaben ech mir, eng Rei vun deenen Aussoen, sou wéi se am Artikel stinn, ze zitieren:

“Hierbei müssten die Menschen allerdings Einbußen in Bezug auf die Größe ihrer Wohnfläche in Kauf nehmen (...) und das Wohlbefinden würde auch keinen Abbruch erleiden, wenn Menschen vermehrt in kleineren Wohnungen lebten.“

Weider heescht et:


“Als weitere Lösungsansätze nennt (*Numm*) unter anderem eine Reduzierung der Anzahl von Autos (...) sowie ein durchschnittliches Wachstum des Bruttoinlandproduktes von etwa einem Prozent pro Jahr (...) Darüber hinaus nennt das Forscherteam auch ein Verbot von Kurzstreckenflügen (...) sowie eine allgemeine Reduzierung von Flugreisen als weiterer Ansatzpunkt für eine ökologische Transition.“

An deem Kontext hätt ech folgend Froen un d'Regierung:

1. Ass d'Regierung, esou wéi déi genannte Verriederin vun der ALDE, och der Meenung, datt sech d'Awunner vu Lëtzebuerg aus ëmweltechnesche Grënn an Zukunft drop astelle mussen, a méi kleng Wunnengen ze liewen?
2. Wa jo, gedenkt d'Regierung – ganz am Sënn vun där vun der Regierung propagéierter Transparenz am politeschen Handeln – der Bevëlkerung och zäitno ze kommunizéieren, datt si sech an Zukunft dorop astelle muss, op méi enger klenger Wunnfläch ze liewen?
3. Gesäit d'Regierung hei net d'Gefor, datt sech doduerch d'Liewensqualität vun den Awunner verschlechtert kéint?
4. Ass d'Regierung, esou wéi déi genannte Verriederin vun der ALDE, och der Meenung, datt d'Unzuel vun den Autoen hei am Land misst reduzéiert ginn?

5. Wa jo, gedenkt d'Regierung – ganz am Sënn vun där vun der Regierung propagéierter Transparenz am politeschen Handelen – der Bevëlkerung och zäitno ze kommunizéieren, datt si sech an Zukunft dorop astelle muss, am beschten op den Auto ze verzichten?
6. Gesäit d'Regierung hei net d'Gefor, datt sech doduerch d'Liewensqualitéit vun den Awunner verschlechtere kéint, besonnesch fir déi, déi am méi ländleche Raum liewen a wou den ëffentlechen Transport manner gutt ausgebaut ass?
7. Ass d'Regierung, esou wéi déi genannte Verriederin vun der ALDE, och der Meenung, datt sech d'Awunner vu Lëtzebuerg aus ëmwelttechnesche Grënn an Zukunft drop astelle mussen, net méi - oder wesentlech manner - mam Fliger ze reesen?
8. Wa jo, gedenkt d'Regierung – ganz am Sënn vun där vun der Regierung propagéierter Transparenz am politeschen Handelen – der Bevëlkerung och zäitno ze kommunizéieren, datt si sech an Zukunft dorop astelle muss, net méi - oder wesentlech manner – mam Fliger ze reesen?
9. Gesäit d'Regierung hei net d'Gefor, datt sech doduerch d'Liewensqualitéit vun den Awunner verschlechtere kéint, besonnesch am Hibleck op d'Plangung vun der Vakanz an am Hibleck op de Wonsch vu ville Bierger, aner Länner ze entdecken a sech esou kulturell ze beräicheren?
10. Grad am Beräich vun de Geschäftsreesen si vill Leit drop ugewisen, mam Fliger ze reesen. Mussen an den Ae vun der Regierung och Geschäftsreise mam Fliger an Zukunft méiglechst ënnerbonne ginn? Besteet an den Ae vun der Regierung hei net d'Gefor, datt dëst negativ wirtschaftlech Repercussiounen mat sech bréngen kann? Wa jo, wéi gedenkt d'Regierung dës negativ wirtschaftlech Repercussiounen ofzefiedere?
11. Ass d'Regierung, esou wéi déi genannte Verriederin vun der ALDE, och der Meenung, datt sech d'Awunner vu Lëtzebuerg aus ëmwelttechnesche Grënn dorop mussen astellen, datt de Wuesstem vum Bruttoinlandprodukt sech an Zukunft just nach op ee Prozent belafe soll?
12. Wa jo, gedenkt d'Regierung – ganz am Sënn vun där vun der Regierung propagéierter Transparenz am politeschen Handelen – der Bevëlkerung och zäitno ze kommunizéieren, datt si sech an Zukunft dorop astelle muss, datt de wirtschaftleche Wuesstem aus ëmwelttechnesche Grënn gebremst muss ginn?
13. Eng Reduzéierung vum wirtschaftleche Wuesstem bréngt natierlech negativ Auswierkungen op de soziale Wuulstand vun der Bevëlkerung mat sech, dee grad déi sozial méi schwach Bevëlkerungsschicht am meeschten trëfft. Ass et an deem Kontext an den Ae vun der Regierung ze verantworten, datt duerch ëmwelttechnesch Grënn eng bewosste finanziell a sozial Prekariséierung vun der Bevëlkerung a Kaf geholl gëtt?

Mat déiwem Respekt,



Fernand Kartheiser
Deputéierten